

‘U SUONNU RA’ ‘NNUCCENZA

Nnicuzzu è ‘u figghiu, sciàtu,
sciàuru ‘i latti, uccùzza ri meli ;
ancora si cuntunu ‘i jorna,
‘i misi ‘nti ‘na manu.
‘A mamma so ‘u sapi
ca appena lassa ‘u piettu,
‘u ciàntu so ‘ncuzzàtu,
eni ‘u ciàmu râ nncuzza.
Ma ‘u teni ancora ‘n vrazza, amurusa,
ancora ‘n’attimu, ca arriva ‘u ruttinu.
Ora ‘u posa, arùci arùci,
e, carizzànnulu cull’uòcci,
‘u ‘ffira ô suonnu râ ‘nnuccenza.

A sira, dduoppu ‘n juornu ri caminu,
‘u sulì, impallirùtu, sta cariènnu.
Ma, èccu, ‘u cielu, primurusu,
‘ntramànnisi cchê so capiddi, fila r’oru,
‘u sustèni,
e ‘u cala, ascìddu ascìddu, ‘nta so cuna,
mentri pitta, cu l’ùrtimu ciarùri, ‘a luna,
anzina a cuannu ‘u scuru, ‘mpicciuscu,
si stenni supra r’ogni cosa,
e cuàgghia.

E ‘a morti, matri piatùsa,
‘a matina ancora ‘n juornu ti cunceri,
e ‘a sira, ti stapi ‘n cumpagnia, ô capizzali,
ti teni ‘i fila rê pinzèra,
ti ‘spira ‘na simprici prijèra ;
e appuoi, adàsciu adàsciu, ppi prova,
ti offrisci ‘n’assagghiu r’Aternu,
e tu, ti firi, e t’abbannuni ô suonnu râ ‘nnuccenza,
finu a cuannu, ‘na sira,
‘a prova addiventa chidda vera.

‘U munnu, ammèci, èni viècciu.
Jàvi milli ri milli.....e rutti anni, ca gghira.
Ma à vèniri, anchi la so sira,
ca cari .
E speriamu ca Chiddu ca teni ‘i fila,
lu ‘Nniputenti, ‘u tratteni,
e, se ‘u cala pianu pianu,
cu po’, câ ajutu râ Pruvirienza,
si sarva.
‘Nsiamai su scorda !
Scuàsi, jèmu a finiri tutti ô ‘nfiernu,
e ni sbanisci ‘u suonnu râ ‘nnuccenza.